

TEZAU LITURGIC

3 MAI

SLUJBA SF. CUVIOASE IULIANA ȘI EUPRAXIA DE LA MOSCOVA



MINEIUL PE MAI
MOSCOVA



Месяца мая в 3-й день Преподобных Иулиании и Евпраксии Московских

На велицей вечерни

На Господи, возвах: стихиры на 8, глас 5.

Подобен: Радуйся, Живоносный Кресте:

Приидите, благочестивии людие, / почтим
торжество обители Зачатиевския / и в песнях
возвеличим наставницы премудрыя, /
преподобныя Иулианию и Евпраксию, / теплыя
предстательницы наша пред Господем, / и с
любовию к ним возопиим: / Христа Бога
усердно молите / низпослати душам нашим мир
и велию милость.

Прозябения райская земли Российския, / сестры
по плоти святителя Алексия, / преподобныя
Иулиание и Евпраксии, / вы, издетска
уневестившаяся Христу Богу, / основание
первыя девичия обители / во граде Москве
положили есте / и к Небесному Жениху многия
девы привели есте. / Емуже усердно молитесь /
даровати нам мир и велию милость.

Ублажим ныне, вернии, / святую двоицу
преподобных матерей, / инокинь честных
наставниц, / ангельскаго жития ревнительниц,
/ престольнаго града заступниц, / и с любовию

к ним возопим: / о, предивныя ходатаицы к Богу, / усердными мольбами вашими / сподобите нас прияти мир и велию милость. Радуйтесь, предивныя наставницы, / Иулиание преблаженная и Евпраксии прехвальная, / вы бо трудами неусыпными, / послушанием и смирением дух мирен стяжали есте. / Темже, Царствие Небесное улучивша, / благочестию и любви научаете / с верою к вам притекающих / и просящих подати мир и велию милость.

Слава, глас 2:

Днесь прославим, вернии, / Христа Бога нашего, / дивнаго во святых Своих, / явившаго земли Российстей / прехвальныя и богоносныя жены, / преподобную Иулианию, / первую игумению земли Московския, / и святую Евпраксию, сестру ея возлюбленную, / и тако возопиим: / молитвами, Господи, святых угодниц Твоих / помилуй и спаси нас.

И ныне, Богородичен: Прейде сень законная:

Вход. Прокимен дне. И чтения 3
преподобническая.

На литии стихира храма.

Слава, глас 8:

Срадуйтесь нам, вся верных множества, / стольный бо град Москва / днесь немолчными

гласы воспеваает / светоносную и преславную
память / преподобных Иулиании и Евпраксии, /
тыя бо усердно молят Христа Бога нашего, /
даровати нам мир и велию милость.

И ныне, Богородичен: Безневестная Дево:

На стиховне стихиры, глас 2.

Подобен: Егда от Древа:

Красоты мира суетнаго пренебрегшя / и на
тесный путь стопы ваша направившя, /
преподобныя Иулиание и Евпраксии, / бдения и
пощения в житии претрудном, / яко древняя
подвижницы, подъяли есте. / Сего ради ныне
утешения от Господа / и непрестаннаго веселия
сподобяетесь, / мы же вам вопием: /
радуйтесь, претеплыя предстательницы / и
молитвенницы о душах наших.

Стих: Дивен Бог во святых Своих, / Бог
Израилев.

Присно в страхе Божии пребывающя, /
воздержанием распясте плоти ваша / и
лестницею добродетелей взыдoste во обители
Горния, / идеже, со святыми веселящяся, /
вознесите, угодницы Божия, молитвы ко
Господу / о почитающих пресветлую память
вашу и вопиющих: / радуйтесь, жены
преподобныя, / православным людем
заступление.

Стих: Честна пред Господем / смерть
преподобных Его.

Восхвалим, вернии, боголюбивыя жены, /
преподобныя Иулианию и Евпраксию, / нищеты
Христовы рачительницы, / смирения
хранительницы, / благочестия наставницы, /
иноческаго жития устроительницы, / сирых
утешительницы, / недужных целительницы / и
земли Московския молитвенницы.

Слава, глас 6:

Подвигом добрым подвизавшися, /
всеблаженныя Иулиание и Евпраксиие, / Троицу
Пресвятую и Пребожественную / в житии
вашем прославляли есте, / Ейже ныне со
ангельскими лики предстояща, / не оставите
зовущих вам: / радуйтесь, инокинь наставницы
/ и молитвенницы о душах наших.

И ныне, Богородичен: Творец и Избавитель мой,
Пречистая:

Тропарь, глас 1:

Христу Жениху уневеститися возжелавшыя / и
подвиги иноческаго Того ради понесшыя, /
добродетельным житием и любовью ко всем /
себе украсившыя, преподобныя Иулиание и
Евпраксиие, / во граде Москве первыя обители
девическия / устроительницы явистесья / и
трудоу и подвигов брата вашего святителя

Алексия / ревнительницы показастеся. / Сего ради, ныне на Небесех вкупе с ним торжествующе, / молити граду Москве в Православии утвердитися, / обители вашей сохранитися / и спастися душам нашим.

Ин тропарь, глас тойже:

Христу Жениху уневеститися возжелавшыя, / преподобныя Иулиание и Евпраксии, / во граде Москве обители девическия устроительницы явистеся / и брату вашему, святителю Алексию, в подвизех подражасте. / Сего ради, ныне на Небесех вкупе с ним торжествующе, / молити обители вашей сохранитися, / граду Москве в Православии утвердитися / и спастися душам нашим.

На утрени

На Бог Господь: тропарь тойже, дважды, Слава, и ныне, Богородичен.

По 1-м стихословии седален, глас 8:
Возложшия всю надежду на Бога Вышняго, / попечения суетная остависте, преподобныя Иулиание и Евпраксии, / темже житие восприясте со безплотными Ангелы и, яко звезды пресветлыя, просветистеся. / Мы же

взываем к вам: / молитве спастися душам
нашим.

Слава, и ныне, Богородичен:

Буди нам покров и заступление, Премилостивая
Владычице Богородице, / Ты бо еси немощным
Стена неборимая / и безнадежным твердое
Упование.

По 2-м стихословии седален, глас 2:

Воспоим, вернии, преподобныя матери наша
Иулианию и Евпраксию / и восхвалим Господа,
прославльшаго святыя Своя / и дарующаго нам
мир и велию милость.

Слава, и ныне, Богородичен:

Бога из Тебе воплотившагося познахом,
Пречистая Дево, едина Благословенная. /
Темже, благодаряще, вопием Ти: / радуйся,
Благодатная, Господь с Тобою.

По полиелеи седален, глас 1:

Преподобныя Иулиание и Евпраксиие, /
подвижницы Христовы, инокинь московских
начальницы, / кротости и целомудрия
рачительницы, / милости просящим
подательницы, / болезней душевных и телесных
целительницы, / молитве Христа Бога даровати
нам мир и велию милость.

Слава, и ныне, Богородичен:

Избранная от рода человеческого Ты еси,
Пречистая Богородице, / Тобою бо к нам сошел
есть Христос Бог наш. / Егоже моли спасти
душы наша.

Степенна, 1-й антифон, 4-го гласа.

Прокимен: Дивен Бог во святых Своих, / Бог
Израилев.

Стих: В церквах благословите Бога, / Господа от
источник Израилевых.

Всякое дыхание: Евангелие от Матфея, зачало
104.

По 50-м псалме стихира, глас 6:

Песни духовныя приносяще, / днесь умиленно
вопием вам, / угодницы Христовы, Иулиание и
Евпраксии, / первопрестольнаго града похвало /
и обители Зачатиевския украшение, / молитесь
о нас, любовью вас почитающих, / да Царствия
Небеснаго будем наследницы.

Канон, глас 8.

Песнь 1

*Ирмос: Колесницегонителя фараоня погрузи, /
чудотворяй иногда / Моисейский жезл,
крестообразно поразив / и разделив море: /
Израиля же беглеца, пешеходца спасе, / песнь
Богви воспевающа.*

Сподоби нас, Господи, / достойно воспети
постнические подвиги и преславная чудеса
преподобных Иулиании и Евпраксии, / в них же
имя Твое славно прославися.

Возлюбившая от юности всемилостиваго Бога, /
иноческий путь избрали есте, святые, / и, обеты
монашеския даже до конца соблюдшая, /
спасение обрели есте.

Ведая всеблагий Господь благое желание сердец
ваших, / благослови обитель девичию во
славнем граде Москве устроить, / идеже
ищущии спасения Христа обретаху.

Богородичен: Тебе, Премилостивая Владычице,
усердно молимся / и всю надежду на Тя
возлагаем. / Избави от всякия скорби и нужды
страну нашу Российскую.

Песнь 3

*Ирмос: Утверждаей в начале Небеса разумом / и
землю на водах основавый, / на камени мя,
Христе, заповедей Твоих утверди, / яко несть
свят паче Тебе, Едине Человеколюбче.*

Древним преподобным женам подражающа,
Иулиание и Евпраксии, / на земли ангельски
пожили есте, / темже и ныне с Небесными
Силами во обителях райских сликовствуете.

Любовию и чистотою сердечною уневестилися
есте Единому Жениху Небесному / и, верность

Ему соблюдшя, / с мудрыми девами в брачный чертог вошли есте.

Яко верныя ученицы, / предали есте себе, блаженныя, в послушание святителю Алексию, / брату вашему по плоти, / с нимже ныне возносите теплыя молитвы за землю Русскую.

Богородичен: Тебе, Пречистая Владычице, / песнь хвалебную приносим, / яко Рождшимся от Тебе род человеческий спасется.

Седален, глас 4:

Днесь людие московстии, собравшеся во обитель Зачатьевскую, / радости исполняются и со умилением взывают: / о, преподобныя жены, Иуалиание и Евпраксии, / сохраните место святое сие и не престаните молиться о нас, / недостойных чадах ваших, / честную память вашу празднующих.

Слава, и ныне, Богородичен:

Спаси от бед рабы Твоя, Богородице, / яко вси по Бозе к Тебе прибегаем, / яко нерушимей Стене и Предстательству.

Песнь 4

Ирмос: Ты моя Крепость, Господи, / Ты моя и Сила, / Ты мой Бог, Ты мое Радование, / не оставль недра Отца, / и нашу нищету посетив. / Тем со пророком Аввакумом зову Ти: / силе

Твоей слава, Человеколюбче.

*Любве ради ко Христу вся земная ни во чтоже
вменивша, / труды многия во обители понесли
есте. / Ныне же, блаженныя, радуетесь со
ангелы в чертозе Царя Небеснаго, /
прославляюще Его неизреченную милость.
Не дали есте сна очима вашима, ни дремания
веждама, / но бодрено в житии Христу
послуживша / и любовь к людем явивша,
святые, / образ добронравнаго жития иноком
показали есте.*

*Приемшия светильники ваша и елеем
добродетелей исполнивша, преподобныя, /
изыдoste в сретение Жениху Христу, / Иже и
введе вас в чертог небесный.*

*Богородичен: Молим Тя, Дево, Мати Пречистая,
/ подаждь нам прощение множества
прегрешений / и исцели души наша.*

Песнь 5

*Ирмос: Вскую мя отринул еси / от лица Твоего,
Свете Незаходимый, / и покрыла мя есть
чуждая тьма, окаяннаго; / но обрати мя и к
свету заповедей Твоих / пути моя направи,
молюся.*

*Возлюбивша покаяние, воздержание предивное
яviste / и, святым житием себе украсивша,
удалистесь славы земныя. / Сего ради обретосте*

славу жизни небесная и радость неизреченную.
Яко кадило благовонное, быша молитвы ваша,
преблаженная, / имиже и ныне всех,
приходящих к вам с верою и любовию, / на путь
спасения наставляете.

Во дни святительства брата вашего Алексия
явились есте светильницы благочестия, /
дарующая сирым и убогим утешение, /
страждущим же и немощным заступление.

Богородичен: Творец всех явися из Тебе,
Пречистая Владычице, / милостивно нас
возлюбивый / и от работы вражия избавивый.

Песнь 6

*Ирмос: Очисти мя, Спасе, / многа бо беззакония
моя, / и из глубины зол возведи, молюся: / к Тебе
бо возопих, и услыши мя, / Боже спасения моего.*
Не прельсти вы лукавый соблазнами мира сего и
сластями житейскими, / но, мужественне его
препобедивша, преподобныя, / в терпении
стяжали есте души ваша.

Сердца ваша обители Духа Святаго соделаша,
святыя, / темже и нам помозите сердца
очистити от всякия скверны, / наставницы
премудрыя.

Огнь Божественная любви имуща в душах
ваших, молитвенницы чудныя, / светом
Христовым просветите души / верою и

любвию почитающих вас.

Богородичен: Пречистая Богородице Дево, /
укрепи веру Православную в стране нашей / и
сохрани нас от всякаго зла.

Кондак, глас 2:

Что вас наречем, богомудрыя Иулиание и
Евпраксиие? / Немощныя сосуды естеством, / но
подвиги и труды мужески понесосте; /
смиреныя жены, / но славы отцев воистинну
сподобистеся; / рода честнаго от земных, / но
умалением себе Небеснаго отечества достигосте.
/ Молите усердно Владыку Христа спастися
душам нашим.

Икос:

Христову Церковь украсивша житием вашим,
преподобныя Иулиание и Евпраксиие, / дивныя
наставницы в подвизах иночествующим / и
утешительницы всем притекающим к вам
явилися есте. / Сего ради ныне восхваляем вас
песньми духовными, жены богомудрыя, / и с
любвию взываем: / молитесь усердно Владыку
Христа спастися душам нашим.

Песнь 7

*Ирмос: Божия снизхождения / огонь устыдеса в
Вавилоне иногда, / сего ради отроцы в пеци*

*радованною ногою, / яко во цветнице ликующе,
пояху: / благословен еси, Боже отец наших.*

*Общаго жития женскаго на Руси ревнительницы
бывша, премудрыя Иулиание и Евпраксии, /
собрасте многия инокини во обитель вашу, /
юже не оставите молитвами вашими.*

*Всем приходящим к вам были есте, яко матери
и сестры любезныя: / алчущих напитавша,
жаждущих напоивша, / странных упокоивша,
скорбящих утешивша.*

*Видя Господь веру вашу и усердие преизрядное,
преблаженныя Иулиание и Евпраксии, / дарова
вам благодать чудеса творити, / да прославят
люди Бога, дивнаго во святых Своих.*

*Богородичен: Помилуй нас, Владычице, Мати
Бога нашего, / чающих Твоея помощи и
заступления, / Тя бо едину по Бозе Заступницу
имамы.*

Песнь 8

*Ирмос: Седмерицею печь / халдейский
мучитель / богочестивым неистовно разже, /
силою же лучшею спасены сия видево, / Творцу и
Избавителю вопияше: / отроцы благословите, /
священницы, воспойте, / людие, превозносите
во вся веки.*

*Сугубую благодать восприемша, / боголюбивых
жен явились есте наставницы прехвальныя. / С*

ними же Христу Богу и Церкви святей добре послужили есте.

Богобоязненна и благочестива бывши, преподобная Иулиание, / научала еси ближния твоя благоговению и страху Божию, / имиже всяк, хотяй спастися, / обрящет премудрость и любовь Божию.

Единого Бога взыскуючи, / имела еси собеседники Ангелы Божия, преподобная мати Евпраксии. / Ныне же с ними воспеваеши славу Троице Единосущней и Нераздельней.

Богородичен: Превечного Бога родила еси, Пресвятая Мати Дево, / Егоже поем и превозносим во вся веки.

Песнь 9

Ирмос: Ужасеся о сем Небо / и земли удившася концы, / яко Бог явися человеком плотски, / и чрево Твое бысть пространнейшее Небес. / Тем Тя, Богородицу, / Ангелов и человек чиноначалия величают.

Яко горлицы непорочныя и голубицы чистыя, / принесли есте души ваша в жертву живую Христу, Богу нашему, / Егоже ныне со всеми святыми величаете.

Днесь ликовствуют людие и воспевают Господеви песнь благодарственную: / слава Тебе, Боже, / даровавшему престольному граду

Москве святых заступницы.

Радуйся ныне обитель Зачатиевская, града
Москвы украшение, / в тебе бо прославишася
преподобныя жены Иулиания и Евпраксия, /
благочестием и добронравным житием
возсиявшыя.

Богородичен: Очисти нас от всякия скверны,
Пресвятая Мати Дево, / и избави муки вечныя,
/ Ты бо еси Заступница всеильная рода
христианского.

Светилен:

Пресветлую память вашу празднующе, /
умиленно взываем к вам, досточудныя Иулиание
и Евпраксии: / молитесь ко Господу, / да и мы
сподобимся быти причастники света
невечернаго.

Слава, и ныне, Богородичен:

Исповедуем Тя, Всенепорочная Дево, Владычицу
Богородицу, / родила бо еси Бога неизреченно, /
даровавшаго нам спасение и велию милость.

На хвалитех стихиры, глас 2:

От юности Бога возлюбившыя, / преподобныя
Иулиание и Евпраксии, / иноческаго жития
возжелали есте / и, к подвигом поста и бдения
устремившыся, / непрестанною молитвою
сердца очистили есте, / темже Бог обогати вы

даром исцеления / и многими чудесы прослави.
/ Емуже возопиим: Господи, слава Тебе.

Благословением митрополита Алексия, / святого
брата вашего, / обитель девичию устроили есте,
/ преподобныя Иулиание и Евпраксие, / в
нейже благочестно пожившя, / ко спасению
многия привели есте. / Темже, ныне во обителях
Небесных пребывающя, / с радостию взываете:
Господи, слава Тебе.

Боголюбивыя жены земли Российския, /
преподобныя Иулиание и Евпраксие, / страну
Московскую обителию украсившя / и образ
добронравнаго жития показавшя, /
трудолюбием и нищелюбием Богу угодили есте. /
Темже, ныне во обителях Небесных
пребывающя, / с радостию взываете: Господи,
слава Тебе.

Слава, глас 8:

Воспоим, вернии, преподобныя Иулианию и
Евпраксию, / святые обители Зачатиевския
начальницы, / земли Российския усердныя
молитвенницы / и первопрестольнаго града
Москвы заступницы, / и возопиим Христу Богу
нашему: / дивный во святых Своих, Боже наш,
слава Тебе.

И ныне, Богородичен, глас тойже:
Владычице, прими молитвы раб Твоих / и
избави нас / от всякия нужды и печали.

Славословие великое и отпуст.

На литургии
служба преподобническая.

**[Текст службы преподобным Иулиании и
Евпраксии Зачатейским, одобренный
Священным Синодом нашей Церкви 31 мая
2010 года (журнал №55)]**

